

NEWSLETTER

2018.
december



15 RAZLOGA ZA PONOS

Decembar je magičan mjesec. To je mjesec darivanja, praznične čarolije i lijepih vijesti. Mjesec kada sumiramo sve ostvarene i neostvarene rezultate, kada zaboravljamo sve poteškoće s kojima smo se susretali tokom cijele godine i svu svoju energiju pretvaramo u ljubav i nadu za bolji početak.

Međutim, prava praznična čarolija uveselila je sve u Fondaciji kada su na našu adresu počele pristizati vijesti iz svih krajeva Bosne i Hercegovine

kako su naši stipendisti proglašeni za najbolje studente na svojim univerzitetima. Bura dobrih vijesti nije se stišavala nekoliko dana, a svi u Fondaciji ostali smo zadivljeni kad smo saznali da se s ovakvim vijestima javilo čak petnaest naših stipendista! Neki od njih okitili su se Zlatnom značkom, a neki Srebrenom; neki pak Dekanovom nagradom ili Zlatnom plakatom, a sve zahvaljujući izuzetnim uspjesima koje su zabilježili tokom svoga školovanja.

1. LEJLA RAMIĆ (SARAJEVO) PRAVNI FAKULTET UNIVERZITETA U SARAJEVU

- Zlatna značka Univerziteta u Sarajevu za I ciklus studija na osnovu ukupne prosječne ocjene 9.85
- Zlatna značka Univerziteta u Sarajevu za I i II ciklus studija na osnovu ukupne prosječne ocjene 9.87

Lejla je bila stipendistkinja Fondacije Hastor tri godine. Trenutno je zaposlena kao asistentica na Pravnom fakultetu Univerziteta u Sarajevu i to na Katedri pravno-ekonomskih nauka, pravno-ekonomska naučna oblast.

„Podršku Fondacije Hastor izazovno je sažeti u nekoliko riječi. Premda više formalno nisam stipendistkinja Fondacije Hastor, i dalje osjećam snažnu povezanost sa Fondacijom iz razloga što je njen značaj nemjerljiv i višestruk tokom mog obrazovanja na I i II ciklusu studija. Fondacija Hastor je daleko više od mjerljive novčane podrške, ona predstavlja jezgro mladih i talentovanih ljudi koji svojim primjerom potvrđuju slogan Fondacije "Obrazovanje je izbor pobjednika". Nastojim iznaći prave riječi

kada govorim o Fondaciji. To je bilo teško i ranije, a naročito sada kada iz ove perspektive jasnije uviđam njen značaj i bivam u potpunosti svjesna prilike i povjerenja koje mi se ukazalo činom ulaska u istu. Zbog niza razloga i uz izuzetnu opravdanost mogu kazati da Fondacija Hastor predstavlja stub istinskih i univerzalnih vrijednosti. Uvijek kada govorim o Fondaciji, a to ću uraditi i sada, zahvalit ću se divnim ljudima – učitelju Rami, direktoru Seidu i članovima i članicama administracije na povjerenju koje su mi ukazali. Put do uspjeha bio je lakši uz vašu podršku!

Na kraju želim da vam se zahvalim što i dalje mislite na nas, bivše stipendiste i stipendistkinje Fondacije Hastor!.



2. JASMINA KAVGIĆ (SREBRENİK) EKONOMSKI FAKULTET UNIVERZITETA U TUZLI

- Nagrada za najboljeg studenta Ekonomskog fakulteta od strane Federalnog ministarstva obrazovanja i nauke uručena u Mostaru 11.12.2018. godine.
- Zlatna plaketa za Studenta generacije Ekonomskog fakulteta Univerziteta u Tuzli (18.12.2018.) za najveći prosjek (10,00) na I ciklusu studija na Ekonomskom fakultetu i na Univerzitetu u Tuzli

Jasmina je stipendistkinja Fondacije Hastor tri godine, a drugi ciklus studija nastavila je također na Ekonomskom fakultetu u Tuzli, smjer Računovodstvo i revizija.

„Podrška Fondacije Hastor mi je bila od ogromnog značaja. Nije bilo lahko boriti se s iskušenjima na koje sam naišla tokom obrazovanja, no, bilo je mnogo lakše ići u nove pobjede znajući u podsvijesti da ima neko da

vam da vjetar u leđa i da bude tu, ne samo ao finansijska podrška, nego i kao moralna. Fondacija Hastor je dokaz da se trud i rad isplate i cijene. Divno je biti dio porodice Fondacije Hastor.“



3. ANISA RUHOTINA (SARAJEVO) PRAVNI FAKULTET UNIVERZITETA U SARAJEVU

- Zlatna značka Univerziteta u Sarajevu za I ciklus studija na osnovu ukupne prosječne ocjene 9.83
- Zlatna značka Univerziteta u Sarajevu za I i II ciklus studija na osnovu ukupne prosječne ocjene 9.85.

Anisa je stipendistkinja Fondacije bila tri godine. Trenutno je studentica trećeg ciklusa studija, također na Pravnom fakultetu Univerziteta u Sarajevu. Zaposlena je kao asistent na Pravnom fakultetu Univerziteta u Sarajevu na Katedri građanskog prava, oblast građansko pravo i građansko procesno pravo.

„Angažman na Pravnom fakultetu smatram ostvarenjem svega onoga čemu me Fondacija učila. Da je obrazovanje formula uspjeha i pokretač nas samih, kako su nas učili u Fondaciji, u mom slučaju se uistinu pokazalo, i to vrlo brzo nakon završetka drugog ciklusa studija. Jer, uistinu, znanje je moć.

O pomoći i podršci koju sam dobila kao stipendista Fondacije Hastor uistinu je teško govoriti. Fondacija Hastor nikada nije bila samo izvor materijalne podrške, već izvor mnogo bitnijih vrijednosti, onih životnih. Mnoštvo novih prijateljstava, mudrosti učitelja Rame, volonterski sati na terenu, protkani učenjem i zabavom predstavljaju ono pravo, istinsko bogatstvo. Bila bih neizmjereno sretna ukoliko je moj doprinos Fondaciji barem približan onoj potpori, znanju i vještinama koje mi pruža Fondacija.“



4. BELMANA GERIN (STOLAC)

AGROMEDITERANSKI FAKULTET UNIVERZITETA „DŽEMAL BIJEDIĆ“, SMJER EKOLOGIJA I UPRAVLJANJE OKOLIŠOM U POLJOPRIVREDI

- Dobitnica Dekanove nagrade za uspješno i u roku završenu treću godinu prvog ciklusa studija s ostvarenom prosječnom ocjenom 9,56
- i Zlatne plakete Unije studenata Univerziteta „Džemal Bijedić“ u Mostaru za uspješno i u roku završenu prvu godinu drugog ciklusa studija s ostvarenom prosječnom ocjenom 9,99

Belmana je stipendistkinja naše Fondacije punih 12 godina, a drugi ciklus studija nastavila je na istom fakultetu i studijskom usmjerenju.

„Podrška Fondacije Hastor za mene nije samo materijalna, nego i moralna. Ponosna sam i sretna što sam dio vas sve godine i uvijek kada se predstavljam bilo gdje, spomenem i svoj

status stipendistkinje i volonterke Fondacije Hastor. Smatram da za svaki uspjeh dugujem prvenstveno roditeljima, a zatim i Fondaciji Hastor, jer znam koliko je Fondacija ponosna na sve svoje stipendiste koji su uspješni, prije svega učenici, zatim studenti, a onda u budućnosti i poslovni ljudi..“



5. MAIDA HUSNIĆ (MOSTAR)

FAKULTET HUMANISTIČKIH NAUKA UNIVERZITETA „DŽEMAL BIJEDIĆ“ U MOSTARU, ODSJEK ZA BOSANSKI JEZIK I KNJIŽEVNOST

- Zlatna plaketa Unije studenata Univerziteta „Džemal Bijedić“ u Mostaru za ostvarenu prosječnu ocjenu 9,71
- Priznanje i nagrada Federalnog ministarstva obrazovanja i nauke za najboljeg studenta Fakulteta humanističkih nauka s ostvarenom prosječnom ocjenom 9,71

Maida je stipendistkinja naše Fondacije već treću godinu i trenutno je studentica četvrte godine Odsjeka za bosanski jezik i književnost.

„Od onog trena kada sam potpisala svoj prvi ugovor sa Fondacijom Hastor, mnoge lijepe stvari su se desile u mom životu i ovim putem

želim iskazati iskrenu zahvalnost Fondaciji i istaći da je upravo ona imala velike zasluge u mom razvoju i napretku na studiju. Također, želim reći da ova nagrada pripada Fondaciji onoliko koliko i meni i nadam se da ćemo i u budućnosti nastaviti zajedno koračati i stvarati nove uspjehe.“



6. IRENA KARAMEHMEDOVIĆ (SARAJEVO)

MUZIČKA AKADEMIJA, SARAJEVO

- Srebrna značka na osnovu ostvarenog prosjeka 9.4 za I ciklus studija

Irena je stipendistkinja Fondacije već tri godine. Master studij nastavila je na Muzičkoj akademiji u Sarajevu na Odsjeku za muzičku teoriju i pedagogiju.

„Na mom putu ka uspjehu Fondacija Hastor je imala veliki značaj. S obzirom da sam ove godine imala zdravstvene probleme, njihova konstantna podrška i razumijevanje su mi dali vjetar u leđa. Nadam se da ću im se ovim priznanjem barem malo zahvaliti, jer su oni velikim dijelom zaslužni za ovaj moj uspjeh.“



7. MARIJA PIŠKOVIĆ (POSUŠJE)

MUZIČKA AKADEMIJA UNIVERZITETA U SARAJEVU

- Srebrna značka Univerziteta u Sarajevu na osnovu prosječne ocjene 9.33 za I ciklus studija

Marija je stipendistkinja naše Fondacije četiri godine. Master studij nastavila je na Muzičkoj akademiji Univerziteta u Sarajevu, gdje je završila i prvi ciklus studija.

„Fondacija Hastor je kroz stipendiranje imala veliki udio na mom putu ka uspjehu. Uz finansijsku potporu je olakšala mogućnost školovanja, a svojim programom je proširila znanja i vještine, kako i pomogla prilikom

stjecanja novih. Međutim, ono što čovjeku ostaje urezano za cijeli život, Fondacija Hastor je sa svim svojim članovima stvorila jednu veliku obitelj, koja je podrška u svakom trenutku bilo koje životne situacije. Cjelokupna podrška koju sam dobila od Fondacije pomogla mi je da se izgradim kao osoba u svakom segmentu života i dala sigurnost i motivaciju za nove životne korake.“




8. AMINA VATREŠ (SARAJEVO)
FAKULTET POLITIČ KIH NAUKA UNIVERZITETA U SARAJEVU,
ODSJEK ZA KOMUNIKOLOGIJU

- Srebrna značka Univerziteta u Sarajevu – najbolji student I ciklusa Odsjeka za komunikologiju s ostvarenim prosjekom ocjena 9.31.

Stipendistkinja Fondacije Hastor je već 12 godina, a drugi ciklus studija nastavlja na istom fakultetu i odsjeku.

„Nesebična podrška i stabilan oslonac koji sam kroz Fondaciju Hastor dobila još prije 12 godina u značajnoj su mjeri utjecali na razvoj moje ličnosti i potakli me da uvijek i u svemu budem najbolja verzija sebe, pri tome ne postavljajući si limite ni u čemu što radim niti čemu težim. Stoga je moja ogromna ambicija, samokritičnost, konzistentnost, pa u krajnjoj liniji i ostvareni uspjeh, velikim dijelom i uspjeh same Fondacije.“



9. AMIN SEJFIĆ (ČAPLJINA)
FAKULTET POLITIČ KIH NAUKA UNIVERZITETA U
SARAJEVU, USMJERENJE MEĐUNARODNI ODNOSI I
DIPLOMATIJA

- Srebrna značka Univerziteta u Sarajevu na osnovu ostvarenog prosjeka 9.30 na I ciklusu studija

Amin je stipendista naše Fondacije već osam godina. Svoje školovanje nastavio je na Ekonomskom fakultetu u Sarajevu, usmjerenje Marketing Management.

„Za mene biti dio Fondacije Hastor podrazumijeva jako važan osjećaj – osjećaj

pripadnosti. U proteklih 8 godina sam kao dio velike porodice radio vrijedno i naporno i svaki moj uspjeh je bio vrednovan i nagrađen. Nosim jako lijepe uspomene i ogroman osjećaj zahvalnosti za svu podršku koju mi je pružila Fondacija Hastor, bez koje ne bih mogao postići ništa od navedenog.“



10. AMMAR BISER (BUSOVAČA)
MUZIČKA AKADEMIJA UNIVERZITETA U SARAJEVU

- Srebrna značka Univerziteta u Sarajevu za I ciklus studija na osnovu prosječne ocjene 9.15

Ammar je stipendista Fondacije Hastor već jedanaest godina. Master studij nastavio je na Muzičkoj akademiji.

„Fondacija Hastor nesebično pruža pomoć i dodjeljuje sumu novca koja studentima i roditeljima istih itekako pomaže u ovom teškom vremenu. Pored materijalne pomoći, kao i svi stipendisti upoznao sam mnoštvo dragih ljudi s kojima ću ostati u kontaktu i nakon mog djelovanja u Fondaciji.“



11. ALMEDINA SMAJLOVIĆ (ILIJAŠ, SARAJEVO)
FILOZOFSKI FAKULTET SARAJEVO, ODSJEK ZA
ANGLISTIKU – LINGVISTIČKI SMJER

- Dobitnica Srebrene značke Univerziteta u Sarajevu – jedan od najboljih studenata Filozofskog fakulteta na I ciklusu studija na osnovu prosječne ocjene 9.14.

Almedina je stipendistkinjom Fondacije postala 2016. godine. Trenutno je studentica prve godine II ciklusa studija na istom fakultetu i odsjeku.

„Podrška Fondacije mi zaista mnogo znači, kako ona finansijska koja mi omogućava da ne brinem o tom aspektu studiranja te da se mnogo lakše posvetim svom obrazovanju, tako

i ona moralna koja me motiviše da uvijek dajem najbolje od sebe jer znam da postoji neko ko će moj uspjeh slaviti onoliko koliko i ja sama. Neizmjereno sam zahvalna Fondaciji Hastor na pruženoj prilici i podršci, te se nadam da sam se ovim priznanjem na neki način odužila i opravdala barem dio očekivanja.“



12. AMAR HALILOVIĆ (VOGOŠĆA, SARAJEVO) ELEKTROTEHNIČKI FAKULTET, SARAJEVO

- Dobitnik Srebrne značke za I ciklus studija na osnovu ostvarenog prosjeka ocjena 9.13.

Amar je stipendista Fondacije Hastor dvije godine, a master studij nastavio je na Elektrotehničkom fakultetu u Sarajevu.

„Biti član, stipendista i volonter Fondacije Hastor za mene predstavlja veliko zadovoljstvo. Volontirajući, stekao sam vrijedno iskustvo, koje je mnogo doprinijelo mojem neformalnom obrazovanju. Stipendija i podrška Fondacije Hastor mi je mnogo pomogla u mojem putu ka diplomi.“



13. AZRA MAHINIĆ (MOSTAR) GRAĐEVINSKI FAKULTET UNIVERZITETA „DŽEMAL BIJEDIĆ“ U MOSTARU

- Dekanova nagrada za prvu i drugu godinu II ciklusa studija na osnovu prosječnih ocjena 9.1 za prvu godinu, te 9.3. za drugu godinu studija.

Azra Mahinić bila je stipendistkinja naše Fondacije dvije godine. Nakon završenog drugog ciklusa studija dobila je priliku za stalno zaposlenje.

„Iako sam stipendista Fondacije bila samo dvije godine, usebii dalje osjetim ogromnu povezanost sa Fondacijom i njenim stipendistima. Podrška Fondacije, savjeti učitelja Rame, sve riječi i pouke koje sam izvukla na svakom sastanku u

sali ASA grupacije će mi sigurno ostati za cijeli život. Osjećam da je zaista Fondacija moja druga porodica, ti ljudi koji su mi pružili ruku kada mi je trebala i prepoznali u meni sve ono što je potrebno da ima jedan stipendista Fondacije je zaista neopisivo. Sigurno ću i u budućnosti ostati uz Fondaciju Hastor na bilo koji način, jer osjećam da sam i dalje njen dio iako više nisam stipendista.“



14. TARIK MURATSPAHIĆ (BUGOJNO) PRAVNI FAKULTET UNIVERZITETA U SARAJEVU

- Srebrna značka Univerziteta u Sarajevu na osnovu prosječne ocjene 9.0 za I ciklus studija

Tarik je stipendista Fondacije već tri godine. Master studij nastavio je na Pravnom fakultetu u Sarajevu.

„Podrška Fondacije Hastor je od krucijalne važnosti za studenta koji svojim radom i trudom želi promijeniti svijet oko sebe. Na tom putu, zbog podrške svih zaposlenih, ali i kolega u Fondaciji Hastor svakodnevno nalazim inspiraciju i motiv koji me tjeraju da budem samo još bolji.“




15. MAHIR SKOPLJAK (NOVI TRAVNIK) EKOLOŠKI FAKULTET U TRAVNIKU

- Zlatna plaketa za najboljeg studenta generacije I ciklusa uz prosjek ocjena 8.56

Mahir je stipendista naše Fondacije već 12 godina. Nakon završenog studija aplicirao je na Konkurs za prijem osoba za stručno osposobljavanje koje je raspisala Vlada Srednjobosanskog kantona.

„Činjenica koju bih posebno istaknuo ogleda se u tome da se svaki rad, trud i zalaganje isplati, međutim, ono što bih posebno naglasio jeste

to da za ovaj uspjeh nisam zaslužan samo ja, nego neko ko je bio moj životni pratilac i pored moje porodice bio moja najveća podrška, a to je Fondacija Hastor. Stoga bih izrazio iskrenu i neizmjernu zahvalnost na kontinuiranoj podršci koju mi je pružala tijekom mog obrazovanja.“



Ovih petnaest izuzetnih mladih ljudi više nego ikada ulijevaju nam snagu da to „bolje sutra“ koje tako željno iščekujemo i nije tako daleko kao što nam se čini. Ovih petnaest studenata zaista su primjer novih lidera koje naše društvo istinski treba, a samo ako se povedemo njihovim primjerima i dopustimo da nam ovi mladi ljudi budu uzori, „bolje sutra“ naći ćemo iza ugla.



STIPENDISTI FONDACIJE HASTOR NA WAD KONFERENCIJI U BEČU

Konferenciji We Are Developers, koja je održana 4. i 5. decembra u Beču, imali su priliku prisustvovati stipendisti Fondacije Hastor. Tema konferencije bila je u vezi s umjetnom inteligencijom, te su svi prisutni imali priliku slušati o najnovijim otkrićima u IT svijetu, i to od ljudi iz vodećih svjetskih kompanija. Tako se i osam naših stipendista našlo u ulozi sagovornika zaposlenika Microsoft-a, veoma brzo uplovivši u vode virtuelne realnosti kroz sve tehnologije koje su im bile dostupne.


Uistinu je zanimljivo iskustvo moći isprobati i aplikacija koje su još uvijek u svojim početnim verzijama. Između ostalih, naši stipendisti su imali priliku isprobati Microsoft Translator, aplikaciju koja je bila dostupna za sve učesnike konferencije. Kada bi neko od korisnika napisao ili rekao nešto, isto bi bilo prevedeno za svakog učesnika zasebno, i to na jezik koji je korisnik izabrao.

Osim ove, govornici na konferenciji su pričali o mogućnostima da se uz pomoć umjetne inteligencije raspozna šta je na fotografiji, nakon čega bi se automatski odredio opis iste. Ovo se može uraditi i na videima, a aplikacija će biti dostupna uskoro.

Jedna od interesantnih opcija koja će se ponuditi u Excel-u jesu automatski generisane analize.

Veliki broj workshop-ova, opuštena atmosfera, odlična organizacija, mnogo poklona – stvari su koje će naši stipendisti pamti kada je riječ o ovom događaju. Ipak, više od ovih formalnosti pamte zajednička druženja. Tri dana koja su proveli kao putnici u istom vozilu, cimeri u zajedničkom stanu, te lutajući ulicama Beča – bila su odlična prilika da naši stipendisti razmijene svoje priče.

Neophodno je spomenuti blago razočarenje koje su naši stipendisti doživjeli nakon izvlačenja dobitnika karata za narednu konferenciju u Berlinu. Naime, broj koji je naša stipendistkinja imala bio je samo za jedan veći od izvučenog broja. „Blagi osmijeh u iščekivanju, a onda razočarenje“, Nadira još uvijek o tome priča. Ovo je još jedan od dokaza da smo sretni što imamo priliku biti dijelom Fondacije Hastor, kojoj se još jednom zahvaljujemo na ukazanoj prilici. Iskustvo i prijateljstva koja smo izgradili najveće su bogatstvo s ovog, ali i svakog drugog putovanja.





HACKATON 2018: ALDIN BERIŠA TREĆI NA TAKMIČENJU U PROGRAMIRANJU

Takmičenje u programiranju pod nazivom "EPBiH Hackaton 2018", u organizaciji JP Elektroprivreda BiH počelo je 7. decembra i trajalo ukupno 24 sata. Na takmičenju su učestvovala 24 studenta s Elektrotehničkog fakulteta Univerziteta u Sarajevu, Sarajevo School of Science and Technology, International University of Sarajevo i International Burch University, organizovani u sedam timova. Naš stipendista Aldin Beriša je na ovom takmičenju predstavljao International Burch University zajedno sa svojim kolegama Harisom Jašarevićem, Idom Bajrami i Mehmedom Tulkulićem.

Učesnici su se takmičili u razvoju softvera za unapređenje odnosa s kupcima putem mobilne aplikacije, smart home aplikacije, aplikacije za upravljanje energetsom efikasnošću i edukativne igrice za djecu sa temom "Upoznaj Strujića". Tema koja je dodijeljena Aldinovom timu jeste razvoj smart home aplikacije. Aldin nam je rekao da je takmičenje bilo naporno, pogotovo u jutarnjim satima kada su bili preumorni, ali koristeći Aldinovo znanje Internet of Things tehnologije, koje je stekao kroz svoj startup, Idino znanje po pitanju prezentacija i načina prezentovanja, Harisovo znanje razvoja java aplikacija i Mehmedovu pomoć

pri razvoju, uspjeli su u roku od 24 sata razviti aplikaciju i prezentovati je pred žirijem. Osvojili su 3. mjesto i dobili pohvalu da su imali najbolju prezentaciju i izuzetno dobro osmišljen plan rada. „Bilo mi je zadovoljstvo učestvovati na ovakvom takmičenju, te ne samo univerzitet učiniti ponosnim, već i Fondaciju Hastor. Bez Fondacije ne bih bio na univerzitetu na kojem sam danas, a kamoli na takmičenju kao što je ovo, na čemu ću Fondaciji vječno biti zahvalan“, rekao je Aldin.

Fondacija Hastor je ponosna na Aldinov uspjeh i nadamo se da ćemo i u budućnosti pisati o njegovim ostvarenjima i priznanjima.



PONOSNI NA REZULTATE, POZDRAVLJAMO NOVE IZAZOVE

U subotu, 8. decembra u prostorijama ASA Prevent grupacije održan je posljednji mjesečni sastanak studenata stipendista Fondacije Hastor u 2018. godini. Sastanci studenata stipendista se održavaju tokom cijele godine i prilika su da stipendisti razgovaraju o ličnim iskustvima s volontiranja, eventualnim poteškoćama s kojima se susreću, a često imaju priliku učestvovati u posebno pripremljenim tematskim radionicama, organiziranim u cilju rješavanja zajedničkih problema u lokalnim zajednicama. Tada zajednički radimo na njihovom ličnom razvoju, ali i na pomoći pri njihovom razvoju u radu s mlađima, osnovcima i srednjoškolcima stipendistima Fondacije Hastor. Decembarski sastanak prošao je u duhu isticanja vrijednosti koje njeguje Fondacija Hastor.

Na samom početku sastanka studentima stipendistima su se obratili učitelj Ramo Hastor i direktor Fondacije Seid Fijuljanin, uputivši pozdravne riječi i dobrodošlicu. Nakon toga, veći dio druženja protekao je u duhu prisjećanja i isticanja onoga što Fondacija Hastor jeste i nastoji biti u budućnosti. Studenti su imali priliku govoriti o Fondaciji, naglašavajući dosadašnja ostvarenja u njenom radu, kao i njen značaj za svakog stipendistu.

Direktor je istakao kako je prvobitni kolektiv Fondacije, nakon samog osnivanja, obilazio bosanskohercegovački teren u potražnji za potencijalnim stipendistima, ali se vremenom način odabira stipendista promijenio i uspostavio se izuzetno stabilan sistem koji omogućava lakši rad, kao i nedvosmislen transparentnost, koja je tada, ali i sada jedna od ključnih karakteristika našeg rada. Fondacija Hastor nije isključivo namijenjena talentovanoj djeci i omladini, nego prvenstveno pruža pomoć djeci teškog socio-ekonomskog statusa. Od svog osnivanja Fondacija ohrabruje i podržava osnovce, srednjoškolce i studente iz cijele Bosne i Hercegovine. Direktor Fijuljanin je naglasio kako na adresu Fondacije godišnje pristiže preko 2.500 molbi za odobrenje stipendije, nakon čega se vrši proces selekcije i uz određenu listu bodovanja biraju se učenici i studenti koji će potpisati ugovor o stipendiranju.


Fondacija Hastor je jedna velika porodica koja iz godine u godinu raste, te se nadamo da ćemo u narednoj školskoj i akademskoj godini dostići brojku od 2.000 stipendista, što nas izdvaja u odnosu na sve druge postojeće fondacije i udruženja ovog tipa u našoj državi, ali i regiji. „To je skoro 2.000 porodica, što je minimalan broj ljudi na koje mi, i vi, kao stipendisti možete utjecati. To je skoro 2.000 ljudi s kojima možete podijeliti sve što doživljavate u Fondaciji“, kazao je direktor Fondacije Hastor.

Fondacija Hastor ulaže maksimalne napore kako bi svoje stipendiste, čije se školovanje bliži kraju, pripremila za izazove poslovne sredine i tržišta rada. Iskustvo koje stipendisti stječu prilikom volonterskih aktivnosti od izuzetnog je značaja za njihov budući poslovni uspjeh. Stipendisti Fondacije su u posljednjih godinu dana uspjeli ostvariti 300.000 volonterskih sati, što je, kako je kazao učitelj Ramo, 300.000 sati provedenih van ulice i svih negativnosti koje ona nudi, a svi ti sati se provedu u nastojanju da se pruži pomoć onima kojima je potrebna i da se učini nešto korisno.

Da su studenti pokretačka snaga Fondacije, njeni nosioci svih ovih godina, još jedanput je kazao direktor Fijuljanin, ističući tri osnovne stavke u radu Fondacije Hastor, a to su stipendisti, aktivnosti koje oni organiziraju te donatori, koji potpomažu rad naše fondacije, a time i obrazovanje mnogih mladih, ambicioznih i talentovanih ljudi.

Na sastanku je, također, istaknuto kako će Fondacija u budućnosti nastojati razvijati poduzetnički duh kod mladih s ciljem aktiviranja njihovih kreativnih potencijala, te se svi iskreno nadamo i vjerujemo da će Fondacija u budućnosti uspjeti izvesti na pravi put nove generacije mladih i obrazovanih ljudi, akademskih građana, koji su istinska snaga Bosne i Hercegovine.

Maida Husnić



Dragi učenici i studenti! U ovomjesečnom izdanju rubrike FH učionica, rješavamo nekoliko jezičko-pravopisnih nedoumica i donosimo detaljno objašnjenje za iste.

MI BI URADILI, VI BI DOŠLI...

- *Mi bi uradili, vi ne bi, mi bi došli* i slični oblici kondicionala mogu se svakodnevno čuti u razgovornom stilu, ali i u raznim emisijama na radiju i televiziji, posebno u posljednje vrijeme, kada je broj tih medija povećan, a posao lektora zanemaren.

- Kondicionalom se označava mogućnost, želja ili pogodba da se neka radnja vrši ili izvrši. Ovaj oblik tvori se od aorista pomoćnog glagola *biti* i glagolskog pridjeva radnog glagola koji se mijenja.

- Do greške u upotrebi ovog glagolskog oblika dolazi u aoristu pomoćnog glagola *biti*. Oblici aorista pomoćnog glagola *biti* su:

- *(ja) bih* *(mi) bismo*
(ti) bi *(vi) biste*
(on) bi *(oni) bi/biše.*

- Na te oblike, s izuzetkom oblika za treće lice množine, gdje se umjesto *biše* upotrebljava samo oblik *bi*, dodaje se glagolski pridjev radni. Tako se dobiju oblici:

(ja) bih uradio / uradio bih
(ti) bi uradio / uradio bi
(on) bi uradio / uradio bi
(mi) bismo uradili / uradili bismo
(vi) biste uradili / uradili biste
(oni) bi uradili / uradili bi

Prema tome, nije dobro reći ili napisati:

Mi bi uradili / uradili bi mi,
Vi ne bi uradili,
Mi bi došli / došli bi mi i sl.,

već:

Mi bismo uradili / uradili bismo mi,
Vi ne biste uradili,
Mi bismo došli / došli bismo mi i sl.

Odrična riječca *ne* i uz ove glagolske oblike piše se rastavljeno.

U VEZI TOGA ILI U VEZI S TIM

- Imenica veza može imati različita značenja u bosanskom jeziku. Česta je njezina pogrešna interpretacija kao u primjerima:

- *u vezi toga,*
u vezi tog problema,
u vezi prve tačke dnevnog reda,
u vezi ispita,
u vezi problema koji se javio i sl.

- Ovakve konstrukcije izriču povezanost misli s nečim, neku vrstu društva ili zajedništva imenice veza s nekim drugim pojmom. Stoga njihovo značenje uvjetuje upotrebu prijedloga *s(a)*, pa bi bilo ispravno:

u vezi s tim,
u vezi s tim problemom,
u vezi s prvom tačkom dnevnog reda,
u vezi s ispitom,
u vezi s problemom koji se javio i sl.

Imenica veza može se upotrebljavati i bez prijedloga *s(a)*, ali tada nema značenje društva ili zajedništva:

U vezi čovjeka i žene ljubav je ta nit spajanja.
Njih spaja veza ljubavi i veza prijateljstva i sl.

HVALA VAM NA PAŽNJI ILI HVALA VAM ZA PAŽNJU

- Gotovo uvijek na završetku kakve radio ili televizijske emisije čut ćemo zahvalu: „Hvala na pažnji“ ili „Hvala za pažnju“. Čini nam se da je ova druga rečenica danas češća u upotrebi, kao da voditelji izbjegavaju onu prvu.

- Uz glagol *zahvaliti* može doći dopuna u akuzativu s prijedlogom *za* i lokativu s prijedlogom *na*. Možemo, dakle, reći *Hvala vam za pažnju* i *Hvala vam na pažnji*.

To isto, naravno, važi i za ostale slične primjere neke zahvale:

Hvala vam na kahvi i Hvala vam za kahvu,
Hvala na usluzi i Hvala za uslugu,
Zahvaljujem ti na pomoći i
Zahvaljujem ti za pomoć i sl.

Razim Medinić



KONKURS

Veći dio novembra i početak decembra 2018. godine prođoše u odabiru novih studenata stipendista prijavljenih na raspisani konkurs Fondacije Hastor za dodjelu stipendija.

Komisija za dodjelu stipendija Fondacije Hastor objavila je konkurs za dodjelu stipendija studentima. Na konkurs se prijavilo preko tri stotine studenata koji ispunjavaju postavljene kriterije. Iz te mase vrlo marljivih studenata trebalo je odabrati dvadeset koji će postati stipendisti Fondacije Hastor. Ulogu selektora imala je četveročlana komisija u sastavu: Seid Fijuljanin, Marizela Avdić, Lajla Hastor i ja. Direktor Fondacije Hastor Seid Fijuljanin i član administrativnog tima Marizela Avdić su prijavljene kandidate telefonskim putem intervjuisali kako bi izdvojili šezdest pet studenata koji će ući u užu izbor. Nakon toga je imenovana komisija čitala motivaciona pisma i sa svakim kandidatom/kandidatkinjom razgovarala kako bi prema kriterijima Fondacije Hastor odabrala dvadeset najprioritetnijih koji će biti stipendisti Fondacije Hastor. Članovi komisije postavljali su pitanja i s velikom pažnjom slušali odgovore kako bi saznali da njihova djela govore ono što kazuju.

Tražili smo osobe koje imaju znanje, vole komunikaciju i koje su spremne pružati pomoć svima koji žele znati više, odnosno svima kojima je pomoć potrebna. Pratili smo prethodne uspjehe kandidata/kandidatkinja koji će biti kao zalog daljem obrazovanju i društvenom angažmanu za opće dobro. Odabrali smo one kandidate za koje smo zaključili da su opredijeljeni da zajedno sa drugim mladim ljudima usmjerenim na zajedništvo i pozitivne vrijednosti daju svoj puni doprinos u stvaranju boljeg okruženja koje će kreirati nove generacije. Odabirali smo osobe kojima je u životnoj viziji obrazovanje, usavršavanje i napredak. Odabrali smo dvadeset dva takva studenta koji su odgovorni, uporni, snalažljivi i komunikativni i koje ništa neće spriječiti da ostvare svaki svoj cilj i istraju u svojoj namjeri.

Ramo Hastor



Almedina Smajlović

Da je volonterski angažman fenomen s isključivo pozitivnim predznakom, te da mladoj osobi ne treba biti nikakva vrsta napora dokaz je kontinuirano zalaganje i posvećenost naše stipendistkinje Almedine Smajlović. Shodno tome, pripala joj je titula stipendiste mjeseca, budući da je na raspolaganju Fondaciji u bilo koje vrijeme kada je njena pomoć potrebna, a pored toga, uvijek ima viška odrađenih volonterskih sati.

Almedina je rođena 11. aprila 1997. u Sarajevu, gdje završava osnovnu školu i potom Prvu gimnaziju s titulom ponos generacije. U julu 2018. diplomirala je na Filozofskom fakultetu u Sarajevu, na Odsjeku za anglistiku stekavši zvanje Bachelor engleskog jezika i književnosti. Zahvaljujući svojoj istrajnosti i posvećenosti studiju, Almedini je dodijeljeno i priznanje Srebrena značka Univerziteta u Sarajevu kao jednom od najboljih studenata prvog ciklusa studija. Svoje formalno obrazovanje potom odlučuje nastaviti na istom fakultetu, upisavši master studij na prethodno pomenutom odsjeku, pri tome se odlučivši za lingvistički smjer.

Stipendistkinja Fondacije Hastor je od kraja 2016. godine, no njen prvi susret s Fondacijom desio se mnogo ranije, još 2007. kada je u okviru njenog dugoročnog projekta provela 21 dan na raspustu u Holandiji. Njen volonterski angažman u okviru Fondacije u toku prve godine studiranja bio je orijentiran ka radu s djecom na terenu, a Almedina ističe kako joj je to iskustvo pomoglo da na pravi način uvidi neke od esencijalnih vrijednosti koje Fondacija zastupa i promovira, a to su prevashodno trud, rad, obrazovanje, te pomoć drugim ljudima. Nakon toga je formiran tim prevodilaca Fondacije Hastor čime joj se ukazala prilika da Fondaciji doprinosi radeći ono za šta se zapravo i obrazuje. Almedina je trenutno dio prevodilačkog tima gdje kontinuirano i aktivno vrši prilagodbu tekstova redakcije i stranim govornicima koji su zainteresirani za djelovanje same Fondacije i njenih stipendista. Navodi kako je u Fondaciji upoznala mnogo divnih, ambicioznih i marljivih osoba, te stekla mnoga iskrena prijateljstva. Na mjesečnim sastancima studenata je, kako kaže, stekla i mnogo novih znanja

i vještina za koje vjeruje da će joj u mnogome pomoći u daljem razvoju i progresu, kako profesionalno, tako i lično. Na taj način je postala i komunikativnija i spremnija da iskoristi prilike koje joj se pruže, te je to neposredno utjecalo i na njenu volju da na izvjestan način doprinese društvu i promjenama koje su neophodne za bolju budućnost. Almedina je ove godine volonter za Evropski olimpijski festival mladih (EYOF), koji se ove zime održava u Sarajevu i Istočnom Sarajevu, a time želi pomoći da se naš grad i država općenito predstave u što boljem svjetlu.

Podršku i značaj Fondacije za njen životni, pa i profesionalni put Almedina opisuje na sljedeći način: Mislim da je stvarno potrebno spomenuti i finansijsku podršku koju FH pruža, s obzirom da mi je bilo mnogo lakše posvetiti se učenju i obrazovanju kada sam znala da ću moći pokriti sve obaveze i da će to znatno olakšati i mojim roditeljima. Naravno, tu je i moralna podrška koju uvijek moramo spomenuti, jer je zasigurno lakše hrabro koračati ka budućnosti kad znate da postoji neko kome se uvijek možete obratiti za pomoć, prijateljski savjet ili dobronamjernu kritiku, i kad se taj neko raduje vašem uspjehu onoliko koliko i vi sami.

Almedinine težnje za budućnost usmjerene su prvenstveno ka aktueliziranju značaja lingvistike kao domena njenog budućeg djelovanja, ali i samog formalnog obrazovanja. Voljela bih da na neki način dam doprinos razvoju lingvistike na našim prostorima i stvaranju većeg interesovanja za ovu oblast među ljudima generalno, te da pokažem da lingvistika nije nikakav bauk nego baš naprotiv, nešto mnogo zanimljivo.

Njena ostala interesovanja uključuju fudbal i knjige, a ljubav za oboje postoji od djetinjstva i to je nešto u čemu uživa i što je u potpunosti opušta. Slobodno vrijeme naravno voli i da provodi sa dragim ljudima i porodicom, koji su joj također velika podrška u svim njenim planovima i aspiracijama za budućnost.

Amina Vatreš



Po posljednjem objavljenom konkursu za stipendiranje studenata, na adresu Fondacije Hastor pristiglo je tri stotine aplikacija. Komisija za dodjelu stipendija uistinu je imala težak i nezahvalan zadatak – odabrati najbolje. Nakon iscrpne selekcije i intervjuja, konačno možemo obznaniti da je naša fondacija bogatija za – 22 stipendista!

Stoga ćemo narednih nekoliko izdanja newslettera posvetiti predstavljanju upravo njima, našim novim stipendistima kojima želimo srdačnu dobrodošlicu u porodicu Fondacije Hastor!

2. ENA BEŠO



Ima 20 godina i studentica je druge godine studija elektrotehnike na Fakultetu strojarstva, računarstva i elektrotehnike Sveučilišta u Mostaru. Dolazi iz Stoca, malog grada na jugu naše domovine, gdje je pohađala osnovnu i srednju školu koju je završila kao učenica generacije s ostvarenim prosjekom 5.0. Višestruko je nagrađivana na takmičenjima iz različitih školskih predmeta kao što su Fizika, Bosanski jezik, Demokratija i ljudska prava, Historija itd. Bila je aktivno uključena u razne vannastavne aktivnosti kao što su seminari, radionice i slično, te učestvovala u razmjenama učenika što smatra velikim i neprocjenjivim iskustvom.

Uspješno je završila prvu godinu studija s ostvarenim maksimalnim prosjekom ocjena (5.0), te postala jednim od tri studenta svog fakulteta kojima je dodijeljena Rektorova nagrada.

Kao srednjoškolac bila je društveno aktivna kroz brojne srednjoškolske organizacije, te Omladinski krug Medžlisa Islamske zajednice u Stocu. Takva iskustva smatra životnim bogatstvom: „Volontiranjem pomažemo svojoj lokalnoj zajednici, ali i samima sebi razvijajući kod sebe spremnost na interakciju, te osjećaj za društvo i opće dobro“.

Od svojih sugrađana je čula mnogo toga lijepog što Fondacija Hastor čini za omladinu, pa je poželjela postati dio te priče, što se i ostvarilo. „Zaista je čast postati stipendistom Fondacije Hastor, što za mene predstavlja poseban motiv u daljnjem obrazovanju i društvenom angažmanu“.




1. NIKOLINA GAGIĆ



Jedna od novih stipendistkinja Fondacije Hastor, primljena po konkursu raspisanom za akademsku 2018/2019. godinu je Nikolina Gagić iz Srebrenice. Nikolina studira na Akademiji dramskih umjetnosti u Tuzli, gdje trenutno pohađa treću godinu na smjeru Gluma. Gluma je nešto čime se oduvijek željela baviti, međutim, uspjela ju je upisati tek iz trećeg puta, a neposredno prije toga je završila prvu godinu Filozofije na Filozofskom fakultetu Univerziteta u Sarajevu. Pored bavljenja glumom, Nikolina svoje slobodno vrijeme, obično tokom raspusta, ispunjava volontirajući budući da je upravo volonterizam ono što voli da radi, kada za to pronađe vremena.

Drago mi je što je fondacija koja dijeli vrijednosti koje zastupam prepoznala moj trud i volju. Vidim da ću od njih dobiti podršku, a to je ono što je svima nama prijeko potrebno da budemo dobri ljudi, ističe Nikolina. I zaista, Fondacija Hastor je u Nikolini prepoznala primjer mlade, istrajne osobe koja uprkos izvjesnim preprekama na putu uspjeha nije odustala od svojih težnji i ambicija sve dok ih nije ostvarila.



3. LEJLA KORMAN



Lejla je studentica četvrte godine SSST Univerziteta (Sarajevo School Science and Technology) u Sarajevu. Pohađala je Osnovnu školu „Avdo Smajlović“, nakon čega upisuje Sarajevo College. Iako je studentica Ekonomskog fakulteta na već pomenutom univerzitetu, kao jedan od svojih omiljenih hobija ističe izučavanje stranih jezika, čemu posvećuje veliku pažnju, s obzirom na to da su strani jezici potrebni u svim sferama poslovnog, ali i privatnog života.

Ova entuzijastična, prijateljski raspoložena i nadasve vrijedna djevojka postala je stipendistkinjom Fondacije Hastor u decembru 2018. godine, ispunivši uvjete opisane u posljednjem objavljenom konkursu za prijem novih studenata stipendista. Ističe kako očekuje da će joj ulazak u jednu ovakvu porodicu, kao što je naša fondacija, donijeti mnogo pozitivnih ishoda.



Fotografije sa volonterskih sastanaka



„Priče s volonterskih druženja“ nova je rubrika koju ćemo u narednim izdanjima našeg newslettera realizovati uz pomoć naših stipendista. Naime, u ovoj rubrici moći ćete čitati o impresijama stipendista o njihovim volonterskim sastancima. U ovom broju čitajte kako volonterska druženja izgledaju u očima naše stipendistkinje Lejle Kadrić.

„Svaki volonterski sastanak za mene predstavlja jedno novo iskustvo. Na sastancima sam upoznala mnogo novih ljudi i stekla mnogo prijatelja. Za svaki sastanak je bila predviđena tema, pa smo uvijek razgovarali i uz razgovor se družili. Uvijek smo imali priliku i određeno vrijeme da iznesemo svoje mišljenje ili da pričamo neke doživljaje iz našeg privatnog života.

Na jednom od naših sastanaka, moj kolega i sad već Vaš bivši stipendista, Selmir Selimović, ispričao nam je jednu jako lijepu priču. Naime, on i njegov amidža su došli na ideju da pomognu jednoj ugroženoj porodici. Nažalost, to je samo jedna od velikog broja porodica koja ima finansijskih problema i kojoj je potrebna pomoć. Ispričao nam je kako su imali tek nešto malo novca za hranu, ali nisu lahko prihvatili takvu vrstu pomoći jer su bili spremni da sami zarade svoj novac. Najtužnije od svega jeste to da im se prilika da zarade nešto novca jako rijetko pružala. Porodica broji šest članova. Majci, jedinoj ženskoj osobi u toj porodici, je ipak trebala pomoć. Naime, majka je imala problem sa vidom i naočale su joj bile neophodne, ali zbog određenih specifikacija i dioptrije, te zbog situacije u porodici, nije bila u stanju da ih sebi priušti. Kolega Selmir i njegov amidža su odlučili da joj pomognu. Spremili su se, upalili auto i odvezli se do najbliže zdravstvene ustanove koja je gospođi mogla pružiti potrebne usluge. Nakon pregleda i tačnog određivanja dioptrije, kupili su joj naočale. Rekao nam je da se njena radost u tom trenutku ne može opisati riječima. Priznala im je da je toliko radosna i da osjeća kao da je prvi put progledala, a ko zna kako je i na koji način, te koliko kvalitetno do tada uopće i vidjela i šta bi se desilo sa njenim vidom da ipak nije dobila naočale.

Bilo nam je jako drago čuti tu priču, jer je sasvim sigurno da našu sreću stvara ono što jesmo, a ne ono što imamo. Priča je ujedno bila i jako poučna i bilo je lahko shvatiti da pomoći drugom znači pomoći sebi. Nadam se da je ovakvih primjera mnogo i da još postoje dobri ljudi. Nastojim biti što bolja osoba i pokušavam iskoristiti svaku priliku da pomognem onome kome je pomoć potrebna, a ja mu je mogu pružiti.“

Na osnovu baze podataka utvrđeno je da su stipendisti i volonteri Fondacije Hastor u proteklom mjesecu zabilježili 20 274 volonterska sata. Kao i do sada, najveći broj volonterskih sati ostvaren je na volonterskim sastancima naših stipendista – studenata, srednjoškolaca i osnovaca na 273 volonterske radionice u 62 općine širom Bosne i Hercegovine. Ovoj velikoj brojci doprinosi i volonterski angažman naših studenata koji volontiraju u administraciji i redakciji Fondacije Hastor, kao i angažman stipendista koji rade na razvoju i održavanju aplikacije Fondacije Hastor i naše web-stranice, ali i angažman svih stipendista koji su u ovom mjesecu pomagali našim volonterima prilikom potpisivanja ugovora s osnovcima i srednjoškolicima na teritoriji cijele BiH. Obavezna tema o kojoj su naši stipendisti diskutovali na svojim volonterskim druženjima proteklog mjeseca je „Metode i tehnike olakšavanja učenja i poboljšavanja memorije (Study smart, not hard!)“. Pored obavezne teme, stipendisti su obrađivali i druge interesantne teme, a naši studenti su dio volonterskih sati odvojili kako bi pomogli mlađim stipendistima da što bolje savladaju školsko gradivo.

20 274

volonterskih
sativolonterskih
radionica

279

61

općina

Neke od najzanimljivijih tema:

“

Altruizam u Fondaciji Hastor

Do it yourself – Izrada novogodišnjih čestitki od recikliranog materijala

“

Poštujemo razlike među nama

Nenasilje počinje sa mnom

”

“

Mi smo ambasadori Fondacije Hastor

U ogledalu vidim svog najboljeg prijatelja

”

ZOI 1984

“

Lični i grupni identitet

Budi promjena koju želis da vidiš u svijetu

Znakovni jezik

”

Općine u kojima su u proteklom mjesecu
održane volonterske radionice:

Draga moja Fondacija Hastor,

već duže vrijeme razmišljam šta da Vam napišem, a da bude vrijedno, da na najbolji mogući način iskažem sve ono što osjećam prema svima vama, mojoj drugoj porodici.

Prvi ugovor sam potpisala 1. septembra 2008. godine u Velagićima (Ključ). Taj dan nisam ni slutila da sam zapravo tim ugovorom dobila novu porodicu, osobe koje su mi dale vjetar u leđa, koje su bile uz mene u svakoj borbi. Kada je učitelj Ramo stao ispred mene tog dana, u njemu sam vidjela ponos, prkos, iskrenost i veliku dozu sigurnosti. Učitelj Ramo je ujedno i najhrabrija osoba koju poznajem, osoba koja prkosi svemu, našem mentalitetu ne obazirući se na ono loše, nego samo na ono dobro, izvlačeći i trun dobra iz osobe.

U početku nisam ni shvatala šta zapravo znači onaj ugovor koji sam pročitala hiljadu puta, i svaki put iznova stežući u rukama, onaj papir ulijevao mi je osjećaj sigurnosti kao da je govorio da ovo nije običan ugovor – ovo je nešto što će obilježiti tvoj život. I stvarno je bilo tako, sad, nakon deset godina shvatam svaku riječ i rečenicu tog ugovora.

Ono što sam shvatila kroz naše mjesečne sastanke je to da je život zapravo kao klackalica. Oni koji su lahki drže te na dnu, oni teški ti pomognu da se vineš visoko. Ipak, za veliki uspjeh i zabavu su ti potrebni i jedni i drugi. Kada se sve sabere, čas si gore, čas si dole. Smiješ se, zabavljaš, učiš, padaš, dižeš se jer je zapravo sve ovo igra u kojoj nema pobjednika, ili bolje rečeno – nema jednog pobjednika. Svi smo pobjednici, što je dobro, jer može li se govoriti o dobitku, ako je neko izgubio?

Pored učitelja Rame, direktor Fondacije Seid je osoba kojoj bih se, također, htjela zahvaliti, a potom i ostalim članovima administracije. Svi zajedno ste stvorili nešto prelijepo, ujedinili ste mlade ljude, omogućili nam, pored svega što smo naučili tokom svih sastanaka, da upoznamo jedni druge.

Pored svega, od vas sam naučila važnu životnu školu, nikad se ne treba prestati boriti jer i kad sam bila dobra ili lošija, vi ste bili uz mene bodreći me kad mi treba i zahvaljujući mi kad sam bila dobra. Iako nisam više aktivni član, s ponosom govorim o vama. Jer, kad jednom postaneš član ove fondacije, srce i dušu predaš zauvijek.

Stipendiste koje sam upoznala i sretala na mjesečnim sastancima su zapravo garancija da gdje god da odem u našoj lijepo Bosni i Hercegovini, znam da ću imati s kim da se ispričam i znam da u svakom gradu imam osobe koje

će rado provesti dan sa mnom jer su svi do jednog prošli komisiju Fondacije, a to mi ulijeva sigurnost da su to osobe za koje vrijedi izdvojiti dragocjeno vrijeme znajući da ću naučiti nešto, s obzirom na to da se naša dragocjena porodica sastoji od inženjera, profesora, učitelja, psihologa... Mi doista jesmo nešto posebno, nešto lijepo i put ka boljoj BiH.

Nakon što sam dobila diplomu u ruke, nisam željela kao i ostali odmah otići iz BiH, jer smatram da dobro u nama može pobijediti svako zlo na svijetu. Ostajem u BiH jer ste mi vi uzor, vi koji ste novac uložili u nas, slobodno mogu reći vojsku koja može i mora popraviti stanje u našoj zemlji. Zahvaljujući tome što smo raznovrsna porodica, uzorom na vas možemo očistiti najljepšu zemlju na svijetu od svega onoga što je čini manje lijepom.

Sad kad sam akademski građanin BiH, želim i moram da joj vratim bar dio uloženog u mene, a nadam se da većina mladih ljudi razmišlja ovako. Najlakše je odustati i reći da nešto nije moguće, ali hrabrost je ostati i boriti se kao što smo i naučili od vas. Potražiti ću posao, a ako i ne uspijem, tražit ću dalje jer smatram da je život borba, a ako sam išta naučila od Vas, onda je to da šta god želiš to i može. Ako mračiš, mračno je, a ako sijaš, sjajno je. Do nas je.

Trebamo potpisati ugovor sa boljom BiH, kao što ste Vi potpisali sa nama, biti uz nju, dajući sve najbolje od sebe i boreći se do kraja jer je život zapravo velika borba, ali nije zadovoljstvo samo u cilju nego i u čitavom putu.

Dragi moji, hvala vam na svakoj sekundi uloženoj u mene, hvala vam što ste izabrali baš mene da budem stipendista. Do kraja života da vam se zahvaljujem malo je.

*„Vjera je kad zakoračiš i napraviš prvi korak onda i kada ne vidiš sve stepenice.“
Martin Luther King.*

Ni ja ne vidim sve stepenice mog života, ali hrabro koračam naprijed jer znam koliko sam naučila od Vas i znam da ste uvijek tu čvrsto stojite iznad mene. Još jednom hvala Vam za sve.

Ponosni stipendista Fondacije Hastor,
Bachelor agronomije Emina Bilajac

FONDACIJA HASTOR

Bulevar Meše Selimovića 16, Sarajevo
033 774 789
033 774 823
fondacija@hastor.ba

REDAKCIJA

Džulisa Otuzbir
Razim Medinić
Belma Zukić
Amina Vatreš
Maida Husnić
Lejla Donlagić
Nirvana Žiško
Zehra Šarić